

Rietveld Academie ta habri na Aruba



DIAMARS a tuma lugar apertura di e “vooropleiding” di Rietveld Academie di Amsterdam na Aruba. E curso aki ta diseña pa duna hendenan interesa den

studia arte haya un impresion di kico un estudio formal di arte ta ensera y tambe ta yuda nan traha riba nan portfolio.

Minister Arthur Dowers, kende

como Minister di Enseñansa ta envolvi hunto cu Minister di Cultura, sra. Michelle Hooyboer-Winklaar den e establecimiento di Rietveld Academie na

Aruba a adresa e studiantenan diamars ora cu nan a haya nan prome pakete di material.

E curso ta wordo duna den e edificio di DA riba L.G. Smith Boulevard te ora e edificio p’e scol ta cla pa wordo usa.

Minister Dowers a bisa e studiantenan cu ora nan corda bek aki 10 aña riba e lugar unda nan a cuminsa nan carera den arte, nan lo tin recuerdo di un lugar cu bunita bista cu ta prikkel nan creatividad. E mandatario a remarca cu e curso aki ta un oportunidad p’e studiantenan desaroya nan mente creativo y explora oportunidadnan pa nan carera.

Minister Hooyboer-Winklaar y Ben Zegers tambe a hiba palabran’e ceremonia simpel, pero significante p’e establecimiento di Rietveld Academie na Aruba.

Minister Hooyboer-Winklaar a menciona cu 50% di e studiantenan di Rietveld Academie ta entrepreneurs y e instituto ta habri porta pa oportunidad pa hopi hende.

Sr. Ben Zegers a menciona cu e edificio awor ta wordo yama awor “De Olifant”. El a splica cu Rietveld ta siña e estudiante “wak”, desaroya un vision y con pa desaroya e vision y traha cu diferente material. Rietveld ta reconoce ningun standard, pero ta traha cu e calidadnan di e persona individual, sr. Ben Zegers a comenta.

Despues di e curso aki Rietveld Academie lo cuminsa cu e opleiding mes. Diesocho estudiante a dicidi di tuma e curso aki cu ta wordo guia pa e artista y maestra Hulandes Jeanette van Raaij.